

आकाशवाणी जयपुर-अजमेर

प्रादेशिक समाचार

दिनांक 24.05.2024

समय: 18.45 बजे

- लोकसभा चुनाव रा छठा दौर मांय काल 58 सीटां माथे चुनाव सारु वोट पड़ेला ।
- राज्य मांय राष्ट्रीय खाद्य सुरक्षा कानून रा तैत पात्र पिरवारां री ई-के.वाई.सी. करायी जावेला ।
- प्रदेश मांय गर्मी अर लू ऊं आज ई साता नी मिली- लू ऊं 6 जणां री मौत ।
- आपदा प्रबन्धन, सहायता अर नागरिक सुरक्षा विभाग लू ऊं बचाव सारु ज़रूरी इंतज़ामात माथे करड़ी निगरानी करण बाबत् कह्यो ।

000

लोकसभा चुनाव रा छठा दौर मांय काल 58 सीटां माथे वोट पड़ेला । ई दौर मांय बिहार री आठ, हरियाणा री सगळी दस, झारखंड री चार, दिल्ली री सगळी सात, ओडिशा री छह, उत्तर प्रदेश री 14, पश्चिम बंगाल री आठ अर जम्मू-कश्मीर री एक सीट माथे संवारे 7 बज्यां ऊं वोट पड़ेला ।

00000

लोकसभा चुनाव सारु पड्या वोटों री 4 जून ने करी जावण वाळी गिणती बाबत कर्मचारियां ने सिखावण दी जा रही है। **भीलवाड़ा** मांय वोटों री गिणती री ड्यूटी मांय लगायी ज्या 414 कर्मचारियां ने सिखावण दीरीजी। **श्रीगंगानगर** जिला मांय ई वोटों री गिणती री तैयारियां चाल रही है।

00000

राज्य मांय खाद्य सुरक्षा कानून रा तैत मुफ्त राशन लेवण वाळा पिरवारां री ई-केवाईसी करायी जावेला। सगळा जिला रसद अधिकारियां ने राशन री सरकारी दुकानां वाळां रे मार्फत ऐडा पिरवारां री 30 जून ताई ई-के.वाई.सी. करावण रा हुकम दिया ज्या है।

00000

देश मांय सरकारी मोल माथे हाल ताई 2 करोड 62 लाख मीट्रिक टन गेहूं री खरीदी करी जा चुकी है, जसे लारला साल मांय करी ज्यी खरीदी ऊं बत्ती है। रबी सीजन 2024-25 रे दौरान 22 लाख 31 हजार किसानां ऊं 59 हजार 715 करोड रुप्या री साखां री सरकारी मोल माथे खरीदी करी ज्यी है। प्रदेश मांय ई हाल ताई सरकारी मोल माथे 9 लाख 66 हजार मीट्रिक टन गेहूं री खरीदी करी ज्यी है। ई बीचे केन्द्रीय पूल मांय गेहूं अर चावल रो स्टॉक मिला र 600 लाख मीट्रिक टन ऊं बत्तो व्हे ग्यो है।

00000

राज्य मांय पड़ रही ज़ोरदार गर्मी अर लू ऊं घणी परेशानी व्हे रही है। लू रो असर रात मांय ई महसूस व्हेवण लाग्यो है। प्रदेश रा उत्तराद-आतूणी हलकां मांय पारो 47 डिग्री सेल्सियस ताई दर्ज कर्यो जा रह्यो है। म्हाणा जैसलमेर खबरनवीस बतायो के जिला रा सरहदी हलकां मांय ज़ोरदार तावडो पड़ रह्यो है अर घणी लू बाज रही है।

.....

फ़लौदी मांय पारो 48 डिग्री सेल्सियस ताई पूग जावण ऊं घणी मुश्किल व्हे रही है। चूरु अर बूंदी जिलां मांय पड़ रही तेज गर्मी बीचे बार-बार बिजली बंद व्हे जावण ऊं परेशानी बध गयी है। चित्तौड़गढ़ मांय ई अधिकतम तापमान 45 डिग्री सेल्सियस ऊं ऊंचो चाल रह्यो है। वठे दिन आंत्यां पाछे ई पारो 31 डिग्री सेल्सियस ताई व्हेवण ऊं रात ने ई घणी गर्मी महसूस व्हे रही है। **चित्तौड़गढ़, जैसलमेर, डूंगरपुर, श्रीगंगानगर, बालोतरा अर बाड़मेर** मांय नगर परिषद री ओर ऊं सड़कां माथे पाणी रो छिड़काव करायी ज्यो। रोड़वेज ई बस स्टैंड माथे पीवण रा पाणी री पूर्ति तैय करेला। रोड़वेज री सी.एम.डी. श्रेया गुहा बस स्टैंड माथे छायादार ठौड़ां पीवण रा साफ़ पाणी, वाटर कूलर अर आर. ओ. री व्यवस्था करण रा हुकम दीना है। **बालोतरा** रा जिला कलेक्टर जनता ऊं लू ऊं बचाव सारु सावचेती राखण री अपील कीनी है। **फ़लौदी, हनुमानगढ़, चूरु, सिरोही, बूंदी, सवाईमाधोपुर अर टोंक** मांय ई जोरदार तावड़ा रे कारण घणी परेशानी व्हे रही है। **चित्तौड़गढ़** जिला मांय ई लू अर गर्मी रे कारण मांदा व्हेवण वाळां री तादाद लगातार बध रही है। ई बीचे **सवाईमाधोपुर** मांय शहर अर मानटाउन हलकां मांय 27 मई ऊं पाणी री पूर्ति पांतरे करी जावेला। दूजी कानी जोधपुर ग्रामीण जिला मांय मोटर गाड़ियां चलावण रा लाइसेंस बणावण सारु गाड़ियां चला र बतावण रो बगत संवारे 9 ऊं दोपेरां 12 बज्यां ताई करण री मांग करी ज्यी है।

00000

प्रदेश मांय आपदा प्रबन्धन, सहायता अर नागरिक सुरक्षा विभाग ज़बरदस्त गर्मी अर लू रा दौर मांय सगळा जिलां ऊं जनता ने लू ऊं बचावण अर जरूरी व्यवस्थावां करण रा हुकम दे र वां री पालना अर करड़ी निगराणी करण बाबत् कह्यो है। विभाग री ओर ऊं सगळा

ज़िला कलेक्टरां ने टेम-टेम परां हालात रो जायज़ो ले र खास जतन करण बाबत् कह्यो है। ई बीचे राज्य मांय पड़ रह्या ज़बरदस्त तावड़ा रे कारण 6 लोगां री मौत री खबर है। आपदा प्रबंधन अर सहायता विभाग ऊं मिली जाणकारी रे मुजब गर्मी रे कारण बालोतरा मांय 3 अर भीलवाड़ा, बीकानेर अर जोधपुर मांय 1-1 जणा री मौत व्हे ग्यी। तेज़ गर्मी रे कारण उपजा हालात ने ध्यान राखता थकां चिकित्सा विभाग री अतिरिक्त मुख्य सचिव शुभ्रा सिंह गर्मी रे कारण व्हेवण वाळी बीमारियां अर इण ऊं जुड़ी ज़रूरी व्यवस्थावां रो जायज़ो लीनो।

000

ज़ोरदार गर्मी रा दौर मांय ढांढा-ढोरां सारु ई इंतज़ामात करी ज्या है। पशुपालन अर गौपालन विभाग रा प्रमुख शासन सचिव विकास सीताराम भाले बतायो के गौशालावां मांय गायां ने मौसमी बीमारियां ऊं बचावण अर वां री रोकथाम सारु जिलां ने गायां री दवाइयां री खरीदी सारु एक-एक लाख रुप्या मुहैया करायी ज्या है। भाले बतायो के गौशालावां मांय लंपी गीमारी ऊं बचाव सारु काल टीका लगावण रो कार्यक्रम सरु कर्यो जावेला।

000

राज्य मांय पड़ रह्या ज़बरदस्त तावड़ा बीचे जनता ने मुहैया कराया जावण वाळा सुबीतां रो जायज़ो लेवण सारु आला अहलकार लगातार दौरा कर रह्या है। **ब्यावर** रा जिला कलेक्टर उत्सव कौशल आज टॉडगढ़ अर बंजारी गांवां रो दौरा कर र पीवण रा पाणी ऊं जुड़ी व्यवस्थावां रो जायज़ो लीनो अर अहलकारां ने ज़रूरी हुकम दीना। वे जनता ऊं पाणी सोच-समझ र खर्च करण री अरज कीनी। **जैसलमेर** रा

जिला कलेक्टर प्रताप सिंह ई अमरसागर ग्राम पंचायत मांय रात्रि चौपाल रे दौरान जनता री परेशानियां सुणी अर अहलकारां ने बिजली-पाणी मुहैया करावणो तैय करण समेत ज़रूरी हुकम दीना। **बालोतरा** रा जिला कलेक्टर सुशील कुमार यादव ई तेज़ गर्मी अर लू ने ध्यान राखता थकां रिफाइनरी अर इण री आवासीय कॉलोनियां रो दौरो कीनो अर ज़रूरी हुकम दीना। **बाड़मेर** मांय लू रा मरीजां री बधती तादाद ने ध्यान राखता थकां ज़िला कलेक्टर आज ज़िला अस्पताल रो दौरो कर र व्यवस्थावां बनायी राखण रा हुकम दीना। **सवाईमाधोपुर** रा ज़िला कलेक्टर ई राजनगर, बालमंदिर कॉलोनी अर केशव नगर मांय जा र लोगां ऊं पाणी री पूर्ति रा बारा मांय जाणकारी लीनी। कलेक्टर जनता ऊं पाणी रो बेजा इस्तेमाल रोकण री अपील कीनी। वे अहलकारां ने खराब हैंडपंप ठीक करावण र हुकम ई दीना। **कोटपूतली-बहरोड़** री ज़िला कलेक्टर कल्पना अग्रवाल बहरोड़ मांय जिला अस्पताल रो दौरो कर र लू अर गर्मी रे कारण मांदा लोगां सारु खास व्यवस्थावां करण, ज़रूरी दवाइयां रो स्टॉक राखण अर साफ़-सफाई राखण रा हुकम दीना। वे वार्ड नंबर 1 मांय पीवण रा पाणी री पूर्ति ऊं जुड़ी व्यवस्थावां रो ई जायजो लीनो।

00000

राज्य मांय न्यारी-न्यारी ठौड़ां जंगली जिनावरां री गिणती रो ई बार रो काम पूरो कर लियो ज्यो है। चित्तौड़गढ़ ज़िला रा बस्सी अर सीतामाता अभ्यारण्य अर टेरिटोरियल एरिया मांय गिणती करी ज्यी। बस्सी सेंक्चुरी हलका रा बड़ा पानी, अंबा पानी नाका माथे ट्रैप कैमरा मांय मादा तेंदुआ दो शावकां सागे निजर आयी।

ई सागे ई एक अजगर, हिरण, चौसिंगा, कबर बिज्जू, बांदरा, जंगली सूअर, मोर अर रोजड़ा ई निजर आया। सीतामाता सेंक्चुरी री तीन्यू रेंज धरियावद, जाखम अर बड़ी सादड़ी मांय तेंदुआ, चौसिंगा, हायना, जंगली बिल्ली, लोमड़ी, बीज्जू, जंगली सूअर अर **उड़न** गिलहरी निजर आया। नीम का थाना जिला री नीम का थाना, श्रीमाधोपुर, पाटन अर खेतड़ी

वन रेंज मांय करी ज्यी जिनावरां री गिणती रे दौरान नीम का थाना मांय बघेरा, सियार ,जंगली बिल्ली, ज़रख, बिल्ली, लोमड़ी ,भेड़िया, छोटा अर मोटा बीजू ,सांभर ,रोजड़ा, जंगली सूअर , सेही , काळा अर लाल मुण्डा रा बांदरा, खरगोश, सारस अर मोर निजर आया।

00000

जैसलमेर मांय मनरेगा रा तैत कमठाणा माथे मजूरां री ऑनलाइन फर्जी हाजिरी अर जूना फोटो अपलोड करण री शिकायतां ने ध्यान राखता थकां लोकपाल योगेश गज्जा निरीक्षण कीनो। ई दौरान सगरों की बस्ती, सतो, म्याजलार अर बेरसियाल ग्राम पंचायतां मांय फर्जीवाड़ा री ठा पड़ी। आं ग्राम पंचायतां रा ग्राम विकास अधिकारियां ने नोटिस दे र स्पष्टीकरण मांगी ज्यो है अर आला अहलकारां ने कागद भेज र संबंधित ग्राम विकास अधिकारियां अर तकनीकी सहायकां रे खिलाफ़ नियम रे मुजब कार्यवाही करण बाबत् कही ज्यो है।

00000

बाड़मेर रा आदर्श स्टेडियम मांय सात दिन रो योग शिविर लगायी ज्यो है। शिविर मांय सिरकत करण वाळा आज श्रमदान ई कीनो। जयपुर मांय सही कसरत सागे सही खाण-पीण अर ध्यान रा गुर सिखावण सारु एक गैर-सरकारी संस्था री ओर ऊं 28 मई ऊं 2 जून ताई शिविर लगायो जावेला।

000